


www.BibleForChildren.org


Mateo 26




Kwasala
mazhuba mashanu
nelimwempela kuti
iPasika liswike, Jesu
wakenda kuBhetani, yoko
kwaluba kuli naLazalo,
wakamuswa naJesu kubafi.
Mariya wakatola iganta
lyelita yobunde bwenadi
bwakabeshoba imali yopezhulu,
akaguba makumbo aJesu,
akabukusha makumbo aJesu eshingisa
masusu awe, ingumba yose ikanhuwilila
bunde.



Umwe wabaligumi nababili, Judasi Sikaliyoti wakenda kubatebuji bakulwana kunoucheta. Pabakazwiwha yezwi bakashanta, bakombimbisa kuumpa imali. Iye wakapota inzila yokumpilija kwabali.



Balayijwa bakata sezwabakalayijwa
naJesu bakalonganyila kulya
kwePasika. Bakati bechinolya Jesu
wakatola chinkwa, akachikombolela,
akachimedula, akachipa balayijwa
babe, eti, “Tolani mulye, yoyu umbili
wangu.” Wakatola unkombe akaboka,
eti, “Inwani mose, nokuti yeli ilopa
lyangu lyechivumilano
lichakutukila banji
kutila kuti
luchinyo
lulekejelwe.”



“Simoni, Simoni, whilila, Satani wakumbila kuti ekupyeke sekoloni, asi ndakunamatila, kuti usikonwe mukudimbwa kukwo; asi ungochingunuka, simisa banakwaina babo.” Wakashandula eti, “She, imi ndilozwipila kunda muntolongo nokufa namwi.” Wakati, “Ndokubuja Pita, kuti igukulume lisanhu lyakokolika nasi, unoba wandilamba katatu kuti autondiziba.”



Jesu wakenda nabo
kubugalo bunowhi
Gesemani, akati
kubalayijwa babe,
“Galani yopa,
ndikumunda yopaya
kunonamata.” Akale wakati,
“Abha! Tate! Kunamwi
zwose zwinotikana;
nyendulusani unkombe
yoyu kwandili; koga kusibe
kuda kwangu, koga kube
kuda kwenu.”



Nokudalo Judasi wakapiwa igapo lyabalwi nabalindi
betempeli kubatebuji bakulwana akale nokubaFalisi,
bakenda kuchilili yecho, beli namalambi
nomwenje akale nezwilwaniso. Umwe
wabo wakatema akadubula inzebe
yokululyi yondanda wontebuji
unkulwana. Asi Jesu wakati,
“Zwakwana yezwi!”
Wakaguma inzebe
akonchilisa.




Bakombhata bakenda naye kungumba yontebuji
unkulwana. Pita wakatobela ekwendela kule;
Pakabangijwa moto pakati polubazhe,
Pita wakagala
pakati pabo.





Umwe wabashingi
bontebuji unkulwana,
igamu
lyowakabadumulwa
inzebe naPita,
wakabhuza eti,
“Andijakubona na uli naye
muchilili?” Pita akale
wakapamha enyenyēja,
pakalepo igukulume
lyakakokoleka. Wakabhuda
akenda pazhe akanolila kasakasa.




Igapo lyose lyabanhu lyakanyamuka
likonsenga kunaPilato. Pilato
wakombhuza eti, “Uli She wabaJuda
na?” Iye wakashandula eti, “Seni
ndiwi wazwileba.” Pilato wakapamha
kwabali eda kusupula
Jesu; asi bakashomeja
beti, “Unkahamile!
Unkahamile!”



Kova oompila kwabali kuti
ekahamilwe. Nezwo balwi
bakontola Jesu. Wakanyamula
unchinjikwa uwe, benda
kubugalo bunowhi bugalo
bwebhepe lyonsholo, bunowhi,
(muchHebhelu iGologota.)




Kwakaleko bakonkahamila
panchijikwa, nabamwe babili,
Jesu eli pakati pabo.



Kwakababa iawa yashanu nemwempela, kukaba
nenhilima ishango lyose kujine kukaba iawa yashanu
ina mana, izhuba lyasikatilwa, uncheke womuTempeli
ukajeluka pakati nopakati.

Jesu wakalila eshomeja
newhi igulwana, akati,
“Tate ndinopila umpepo
wangu mumaboko enu.”
Paakapeja kuleba
yezwi wakafema kopejisila.



Kwakaba madekwana lyakabeli izhuba
lyokulonganyila, nokuti lyaluba
izhuba linotangila iSabata,
kwakaswika Josefa
weAlimatiya, umwe
wakabelemekejwa
wamakulukota,
emene wakaba
elindila bushe

bwaMwali,
wakenda kuna Pilato,
esinotya, akakumbila
untumbu waJesu.




Iye wakatenga uncheka umbhodo,
akabhuluja untumbu, akompeteleja
noncheka yoyo, akombiga
mugumbu lyakachiwa
mubwe, akakungulujila
ibwe kuvala igumbu.



Feno nezhuba linotobela, lyesabata,
batebuji bakulwana nabaFalisi
bakenda kunaPilato,
bakati kwaali, “Tezi
tayeya kuti unchangeji
yondiya paakaba eli
umpenyu wakati,
‘Mushule
mwamazhuba
matatu


ndinoomuka.””



“Nokudalo bakenda bakamatila ibwe
bebiga imhande,
nokusiya balindi babo.”




Mushule mweSabata, kumijelo
nezhuba lyokutanga lyeviki, Mariya
wokuMagadala noumwe
Mariya bakenda kunobona
igumbu.




Bonani, kwakaba nokuteketa
kwenyika kukulugulu, nokuti
ingilozi yaTezi yaluba
yabheluka iva kudenga,
ikakungulija ihando
yebwe yelyo
pankoba, ikagala
pakale.

Balindi bakateketa
betya iye, bakaba
sabalofa.




Koga ingilozi yakati kubanhukaji,
“Musitye, nokuti ndinoziba
mukumupyanga Jesu wakaba
akakaamilwa. Aachipo
yopano, nokuti wamuka
mubafi, sokuleba
kukwe. Izhani
mubone pabugalo
paakabakalajikwa.”



Bakabhuda kugumbu nokukambija beli
nolutyo akale nokushanta kukulwana,
bakalabuka kunobuja balayijwa
babe. Bonani, Jesu
wakabashangana nabo akati,
“Mwamuka.” Nokudalo
bakaswika bakafhugama,
bakombhata kumakumbo

bakonamata.





Shule mwezwi wakazwitondejela kuna baligumi
nomwempela, beligele pabakabelya; akabapa undandu
pezhulu pokusodimbwa kwabo nobukukutu bwemyoyo
yabo, nokuti abajakadimbwa kuna yabo bakombona
amuka. She Jesu wakati alebeleka nabo, wakatolwa
akenda kudenga akanogala kuluboko lolulyi lwaMwali.



Nokuti Mwali wakayida inyika,
zwokuti wapakila Mwananhulumyana
umwempela uwe, kuti yoyo
unodimbwa kwaali, aatoopala
koga unoba nobupenyu
businopela.



Loma 3:23 tose tilochinya, atitoswikila kabuchena
bwaMwali,

Loma 6:23 Nokuti indipo yoluchinyo lufu, koga chipo
cheshe chaMwali bupenyu businopela muna Kristo
Jesu Tezi wedu.

BaHebhelu 9:27 Somwazwilobambwa, kuti unhu unofa
kamwempela, mushule mwezwo kunozha kutongwa,

BaEfeso 2:8,9 Nokudalo nechipiwo chiche mwaka chijwa
pezhulu pokudimbwa, yezwi azwitova kunamwi, koga chipo
chaMwali, zwisi pezhulu pemishingo, kuti
kusibe nonhu uchashiya.



Loma 10:9,10 nokuti, kana uleba nondomo uwo kuti Jesu
ndiShe, akale udimbwa mumwoyo uwo kuti Mwali
wakoumusa mubafi, unoochijwa. Nokuti unhu unodimbwa
nomwoyo uwe nezwo unolulamiswa, unoleba nondomo
uwe nezwo unochijwa.

Joni 3:16,17 Nokuti Mwali wakayida inyika, zwokuti
wakapila Mwananhulumyana umwempela uwe, kuti yoyo
unodimbwa kwaali, aatoopala koga unoba nobupenyu
businopela. Mwali aajakatuma Mwananhulumyana uwe
penyika kuti ezhe koobetekesa inyika, koga kuti inyika
ichijwe pezhulu pape.



1 Joni 5:11-13 Yobu ndibwo busumikiji bwokuti, Mwali wakatipa bupenyu businopela, akale yobu bupenyu bwimo muMwananhulumyana uwe. Yoyo unano Mwananhulumyana, una nobupenyu asi, usina Mwananhulumyana waMwali, aanabupenyu. Ndinomukwalila yezwi, imwi mulodimbwa muzina lyoMwananhulumyana waMwali, kuti muzibe kuti muna nobupenyu businopela.



Mateo 26-28; Luka 22-24; Joni 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Nambya NT (nmq) The word for The World International

©2026 Bible for Children, Inc.

www.M1914.org

www.bibleforchildren.org

